

Մամլոյ Հաղորդագրութիւն

Հ.Բ.Ը.Ս.Ի 90-ՐԴ ԸՆԴՀԱՆՈՒՐ ԺՈՂՈՎԸ ՓԱՐԻԶԻ ՄԷՋ ԻՐ ՈՒՇԱԴՐՈՒԹԻՒՆԸ ԿԸ ՍԵՒԵՌԷ ԱՊԱԳԱՅԻՆ

27 Փետրուար 2019

Անմիջապէս Հրատարակութեան Համար

Փետրուար 7-9, հարիւրաւոր հայեր եւ համակիրներ աշխարհի հեռաւոր ծայրերէն, մինչեւ Ճափոն եւ Ուրուկուէյ, Հարաւային Ամերիկա եւ Աւստրալիա, հաւաքուած էին Փարիզի մէջ, Հ.Բ.Ը.Ս.Ի 90-րդ Ընդհանուր Ժողովին առիթով: Երեք օրերու ընթացքին, տարբեր ծրագիրներու ամբողջական յայտագիր մը գործադրուեցաւ, քաղաքի սրտին գտնուող յատկանշական շարք մը կառոյցներէ ներս, սկսած Էյֆելի աշտարակին մէջ կայացած բարեգալուստի երեկոյէն, որ մեկնարկ հանդիսացաւ շաբաթավերջի եռուն գործունէութիւններուն, որոնց ընթացքին, 113 տարիներու վաստակ ունեցող կազմակերպութիւնը, անցնող երկու տարիներու իր գործունէութիւններուն արժեւորումին առընթեր, քննարկեց նաեւ հայաշխարհը յուզող ապագայ մարտահրաւերները, որոնք կը բխէին ընկերային թէ ճարտարագիտական մարզերու մէջ իրականացուող համատարած զարգացումներու պարտադրած համաշխարհայնական նոր հոլովոյթներու սուր հրամայականներէն: Նոյն առիթով, Միութիւնը պատուեց նաեւ համայնքի յայտնի դէմքեր, որոնք իրենց ներուժը ի գործ դրած են ապահովելու համար կազմակերպութեան իր ամենամեայ դրոշմով լայն հասողութիւնը շուրջ 97 երկիրներու մէջ աւելի քան 500,000 հայերու կեանքերէն ներս:

Ուրբաթ երկոյեան, Փարիզի հոշակաւոր *Ուակրամ* համերգասրահէն ներս տեղի ունեցաւ Շարլ Ազնաւուրի նուիրուած յարգանքի յուշահամերգ մը: Խնամքով ծրագրուած յայտագիրին իրենց մասնակցութիւնը բերին Շարլ Ազնաւուրի հետ երկար տարիներու ընկերակից դաշնակահար Էրիք Պերշօ եւ ճէզ երգչուհի Ճօէնա Մէնտիլ: Հայութեան համաշխարհային պատուիրակին, ֆրանսահայ հանճարեղ երգիչին իրայատուկ կատարողական արուեստը բնութագրող նմոյշներ ներկայացուցին յատկապէս հրաւիրուած ժամանակակից երիտասարդ տաղանդաւոր արուեստագէտներ՝ Նարինէ Տօվլաթեան, Իվեթա Մուկուչեան, Սոնա Ռուբէնեան, Սրբուհի Սարգսեան եւ Կոր Սուրճեան, երաժիշտներու ընտրեալ խումբի մը ընկերակցութեամբ: Բազմատաղանդ հանդիսավար Հայկ Պետրոսեանի հաղորդական եւ աշխոյժ ղեկավարութեամբ եւ մէջընդմէջ կատարումներով, որոնց զուգահեռ նաեւ Ազնաւուրի կեանքէն պատկերներու լուսարցակումներով, ներկայ հանդիսատէսներու խումբն բազմութիւնը, յուզումի եւ վայելքի անկրկնելի պահեր ապրեցան, եւ յոտնկայս երկար ծափահարութիւններով յայտնեցին իրենց գնահատանքը:

Հանդիսութեան ներկայ էր Ազնաւուրի որդին եւ Ազնաւուր Հիմնադրամի համահիմնադիր Նիքոլա Ազնաւուր: Բաժնելով իր զգացումները ան ըսաւ. «Մենք խոր գոհունակութիւն կը զգանք Փարիզի

մէջ Հ.Բ.Ը.Մ.ի ընկերակցութեամբ յարգանքի տուրք մատուցանելով հօրս յիշատակին: Ասիկա նախաքայլն է Հ.Բ.Ը.Մ.ի եւ Ազնաւուր Հիմնադրամի միջեւ հետագայ բազմաթիւ գործակցական նախաձեռնութիւններու: Ազնաւուրի համամարդկային ոգիին ու արուեստին ժառանգը եւ անոր սիրոյ եւ երջանկութեան կենդանի շունչը միշտ վառ պիտի մնան մեր սրտերուն եւ մտքերուն մէջ:»

Յաջորդ օրը, Շաբաթ 9 Փետրուարին, *Լէ Տարսէն Սէն Տօմինիք*-ի մէջ կայացած Հ.Բ.Ը.Մ.ի 90-րդ Ընդհանուր Ժողովի ընթացքին, Միութեան անդամները միաձայնութեամբ Կեդրոնական Վարչական Ժողովի չորս նոր անդամներ ընտրեցին – Հայկ Արիեան, Նատիա Գործունեան, Վարդէս Գնաճեան եւ Արի Լիպարիտեան: Համագումարը առիթ էր նաեւ գնահատելու Հայութեան իրենց յատկանշական նպաստը բերած շարք մը արժանաւոր անձնաւորութիւններ:

Ֆրանսացի քաղաքագէտ Փաթրիք Տէվէճեան, գնահատուեցաւ Պօղոս Նուպար պատուաքանակով, որ միութեան բարձրագոյն պատուանշանն է որուն կ'արժանանան այն անհատները, որոնք անխոնջ կերպով ծառայած են համայնքին եւ օգնած, որ ուրիշներ եւս բարձրանան իրենց հետ: Տէվէճեանի փալուն գործընթացը յատկանշուած է որպէս յայտնի փաստաբան, իր հանրային ծառայութեան տարիներու ընթացքին մարդկային իրաւանց պաշտպանութեան աննկուն ախոյանի դերով: Արդարութեան եւ Ցեղասպանութեան ճանաչումին ի խնդիր Տէվէճեանի հետեւողական եւ յամառ աշխատանքին իբր արդիւնք, իրականացաւ ֆրանսական *Հոլոքոսթ*-ի օրէնքին 2016-ի յաւելումածը, որ մարդկութեան դէմ ոճիրներու, ցեղասպանութեան եւ պատերազմական ոճիրներու նկատմամբ ուրացման կամ արհամարհական որեւէ կեցուածք, կը նկատէ պատժելի ոճրային արարք: Որպէս հայ աշխարհաքաղաքացի իր օրինակելի գործունէութեամբ, Փաթրիք Տէվէճեան ճամբայ կը հարթէ ղեկավարներու երիտասարդ սերունդին համար:

Միութեան մասնաճիւղերուն եւ ծրագիրներուն մատուցած իրենց երկարամեայ եւ նուիրեալ ծառայութեան եւ ցուցաբերած միութենական բարձր ոգիին համար գնահատանքի արժանացան նաեւ շարք մը պատասխանատու անդամներ եւ պաշտօնեաներ: Թամար Խապայեան Սուրիայէն, Սոնիքա Նալպանտեան Պրագիլէն, Մարալ Զօրպաճեան Աւստրալիայէն, Հերմինէ Տիւզեան Ֆրանսայէն եւ Ռուբէն Կէտիքեան Արժանթինէն: Գնահատուեցան նաեւ տարբեր շրջանակներու եւ յանձնախումբերու նշանակելի նախաձեռնութիւնները, որոնց շարքին Նիւ Եորք եւ Շրջակայքի եւ Հիսիսային Քալիֆորնիոյ Երիտասարդ Արհեստավարժներու խմբակցութիւնները:

Նոյն օրը երեկոյեան, Ընդհանուր Ժողովի մասնակիցները համախմբուեցան Փարիզի ամենայայտնի ճաշարահներէն *Լը Փալիյոն Լըտուայէն*-ի մէջ, Հ.Բ.Ը.Մ.ի *Կալա* շքահանդէսին: Գեղափայլ երեկոյի հանդիսավարներն էին Կեդրոնական Վարչական Ժողովի անդամ Անի Մանուկեան եւ Լոնտոնի Հիմնադրամի հոգաբարձական կազմի անդամ Քամիլիօ Ազգուզ: Ներկաներուն համար անսպասելի, սակայն նախապէս բժախնդրօրէն պատրաստուած նախաձեռնութեամբ մը, պատիւի արժանացան երկու զոյգեր, որոնք տասնամեակներ շարունակ իրենց բարերար դրոշմը ձգած են Հ.Բ.Ը.Մ.ի եւ յարակից համայնքներուն վրայ: Մարգիս եւ Սեդա Տեմիրճեան եւ Վաչէ եւ Թամար Մանուկեան: Անոնց կեանքին եւ տարբեր համայնքներու հայկական թէ տեղական լայն շրջանակներուն կատարած ներդրումներուն մասին պատմող տեսաերիզներու ներկայացումէն ետք անոնք պարգեւատրուեցան յուշաքանդակներով:

Մարգիս եւ Սեդա Տեմիրճեանները, որոնք կը սերին Սուրիոյ եւ Լիբանանի Միութենական համայնքներուն իրենց բարերար ներդրումը բերած յայտնի գերդաստաններէ, իրենց կարգին

ընկերային, կրթական եւ մշակութային կարելոր ծրագիրներ իրականացուցած են Լիբանանեան թէ Ամերիկեան հայ եւ տեղական շրջանակներէն ներս, որոնց կարգին Ամերիկայի Արեւմտեան Ափի Հ.Բ.Ը.Մ.ի Մանուկեան-Տեմիրճեան Վարժարանի երկրորդական բաժնին կատարած իրենց բարերարութիւնը: Լիբանանի հանրութեան ծանօթ Տեմիրճեան մարզամշակութային համալիրը, որ կառուցուեցաւ իրենց բարերարութեամբ, Լիբանանի քաղաքացիական պատերազմին յաջորդող վերականգնումի ժամանակաշրջանին, այսօր կը հանդիսանայ շրջանի բոլոր համայնքներուն կողմէ օգտագործուող մարզահամալիր մը, որուն ծովափնեայ արդիական գեղակերտ կառոյցէն ներս կը գործեն Լիբանանի Շրջանակային Յանձնաժողովի եւ Հայ Երիտասարդաց Ընկերակցութեան գրասենեակները եւ տարբեր ծրագիրները, զայն վերածելով եռուն գործունէութիւններու կեդրոնի մը:

Վաչէ եւ Թամար Մանուկեանները, որոնց մարդասիրական եւ ընկերային-տնտեսական զարգացման ի նպաստ կատարած ներդրումները ծանօթ են իրենց լայն հասողութեամբ եւ միջազգային բարձր շրջանակներու մէջ գտած ճանաչումով, նոյնպէս արժանացան ներկաներու գնահատանքի եւ երախտագիտութեան ջերմ արտայայտութիւններուն: Վաչէ Մանուկեան առաջիններէն էր որ կազմակերպեց համաշխարհային ընկերութիւններու ներդրումային հոսքը դէպի Հայաստան: Մանուկեանները հետեւողականօրէն բարերարութիւններ կը կատարեն Հ.Բ.Ը.Մ.ին եւ Մայր Աթոռին, ինչպէս Հ.Բ.Ը.Մ.ի Փէստիւնայի Վաչէ եւ Թամար Մանուկեան Երկրորդական Վարժարանը եւ Կատրողական Արուեստներու Կեդրոն համերգասրահը: Միջազգային մարդասիրական կազմակերպութիւններու եւ ծրագիրներու կատարած իրենց բարերարութիւններուն միջոցաւ, ինչպիսին են *ԵՈՒՆԻՄԵՏ*-ը եւ Էլթըն Ճօնի *ԷՅՏԶ*-ի Հիմնադրամը, անոնք ոչ միայն անգնահատելի աջակցութիւն կ'ընձեռեն հազարաւոր կարօտեալներու, այլեւ հայութեան անունը բարձր պահող պատուաբեր դեսպանները կը հանդիսանան ազգին: Վաչէ եւ Թամար Մանուկեաններու կեանքը եւ գործը պատկերացնող տեսերիզին մէջ տեղ գտած էր Նորին Արքայական Բարձապատուութիւն Ուելզի Իշխան Չարլզի անձնական վկայութիւնը, որ իր *Տաֆրի'զ Հաւուզ* ծրագրին համար Մանուկեաններու կատարած բարերարութեան անդրադառնալով, կ'ըսէր. «Յուսով եմ կը զիտակցիք թէ դուք որքան գնահատուած էք Միացեալ Թագաւորութեան համար ձեր կատարած բարեգործութիւններուն կապակցութեամբ: Ձեզ պիտի ուզէի կոչել ազգային հարստութիւն, սակայն կը խորհիմ թէ միջազգային հարստութիւն կոչումը աւելի վայել է ձեզի:»

Գնահատանքի եւ յարգանքի ու երախտագիտութեան տուրքերու առընթեր, շաբաթավերջը յատկանշուեցաւ ապագային վերաբերող խնդիրներու քննարկումին եւ ծրագրումին նուիրուած աշխատանքային հանդիպումներով եւ համագումարով: Անոնցմէ գլխաւորը միօրեայ համագումարն էր, որ Ուրբաթ օր կայացաւ ձեռնարկային նախագիծերու մշակման աշխարհի մեծագոյն կեդրոն համարուող *Մթասիոն Էֆ* համալսարանային համալիրի համագումարներու սրահին մէջ: Համագումարի հանդիսավարութիւնը ձեռներեցութեամբ վարեց Ֆրանսայի Հ.Բ.Ը.Մ.ի Նախագահ Սթէֆան Պետրոսեան: Օրուան ընթացքին տեղի ունեցած քննարկումներուն բովանդակային խորքը կազմող հիմնական նիւթն էր, արդէն շուտով իրականութիւն դարձող ճարտարգիտական զարգացումներու արագալաց ընթացքը, որ հիմնովին կը փոխէր ընկերային-հանրային կառոյցներու, գիտութեան եւ ճարտարարուեստի անհուն կարելիութիւններուն եւ փոխ-յարաբերութիւններուն կապուած դասական ընկալեալ ըմբռնումները, նոր հորիզոններ բանալով մարդկութեան համար: Այդ նիւթին շուրջ լոյս սփռող իրենց տեսլապաշտ եւ խոհուն ելոյթներով հանդէս եկան օրուան գլխաւոր զեկուցաբեր, *Մթօս Էս Ի* ընկերութեան Երեց Փոխ-Գործադիր Տնօրէն եւ Նախագահ Ռոպեր Վասոյեան եւ Հայաստանի Հանրապետութեան Նախագահ Արմէն Սարգիսեան, որ պաշտօնական այցով Ֆրանսա կը գտնուէր այդ օրերուն:

Ձեռներեցութեան նուիրուած առաջին նիստը համադրող Հ.Բ.Ը.Մ.ի Կեդրոնական Վարչական Ժողովի անդամ եւ Միութեան Հայաստանի Նախագահ Վազգէն Եագուպեան ընդգծեց, թէ ձեռներեցութեան ոգին հայ ժողովուրդի յաջողութեան անկիւնաքարը կը կազմէ: Նիստին կը մասնակցէին *Ուէլքի Էնտ Այ Թի* ճարտարագիտական նախաձեռնութեան հիմնադիր Թաթուլ Աճամեան, *Մայրիկ* ճաշարաններու հիմնադիր գործարար Ալին Գամագեան եւ *Իմփէքթ Հասպ Արմինիա*-ի համահիմնադիր գործարար Վահէ Քէօշկերեան: Անոնցմէ իւրաքանչիւրը մանրամասնօրէն անդրադարձաւ Հայաստանի մէջ ձեռնարկութիւններ սկսելու կապուած իրենց փորձառութեան եւ խնդիրներուն, կարելոք նկատելով Սփիւռքի եւ Հայաստանի միջեւ մշակութային տարբերութիւններու ընկալումը եւ փոխադարձ հանդուրժողութեան զարգացումը, շեշտելով նաեւ կին գործարարներու ներգրաւումին անհրաժեշտութիւնը:

Յետմիջօրէի նիստը նուիրուած էր կիներուն եւ կեդրոնացած էր կիներու արդի հիմնախնդիրներուն վրայ, ընդհանրական թէ Հայաստանեան բովանդակութեամբ: Քննարկումնրու համակարգողն էր Կեդրոնական Վարչական Ժողովի անդամ Արտա Յարութիւնեանը: Կը մասնակցէին տարբեր ասպարէզներու մէջ գործող ակնառու աճնաւորութիւններ քաղաքագէտ եւ գործարար Ասդրիտ Փանոսեան, գիրքերու հեղինակ եւ Նիւ Եորքի Համալսարանի դասախօս Էմմա Առաքելեան, *ԸՎՍՏ* *Տէօ Սոնտ*-ի տնօրէն Վալերի Թորանեան եւ *Իսի Լը Շանկայ* Նորաձեւութեան Խմբակցութեան Փոյս-Նախագահ Իզապել Քափրօն:

Համագումարը աւարեցաւ Հայաստանի մէջ Հ.Բ.Ը.Մ.ի նախաձեռնութիւններուն եւ գործընկերային աշխատանքներուն մասին զեկոյցով, գոր ներկայացուց Միութեան Հայաստանի Գործադիր Տնօրէն Դալար Գազանճեան, շեշտելով կին գործարարները քաջալերելու ուղղութեամբ կատարուած աշխատանքները: Իրեն յաջորդեցին գործարար եւ *Հայթէք Եուրոփ*-ի հիմնադիր Արմէն Վերսեան եւ *Տիճիթըլ Թրէնսֆորմէշըն Լիիտ էթ Պրէնթէկ*-էն Հայկ Խանամիրեան, որ խօսեցաւ Եւրոպայի Հ.Բ.Ը.Մ.ի նախաձեռնութիւնը եղող առաջնորդներու պատրաստութեան *Կորիզ* ծրագրին մասին, որուն նպատակն է հայ երիտասարդներու մօտ մշակել համամարդկային խնդիրներու նկատմամբ զգայնութիւն եւ նախաձեռնութիւններու մասնակցելու ոգի:

Միօրեայ համագումարէն անկախ, Ընդհանուր Ժողովին նախորդող օրերուն տեղի ունեցան Հ.Բ.Ը.Մ.ի պատասխանատուներու կողմէ կազմակերպուած երկխօսութեան եւ գաղափարներու փոխանակման երկու աշխատաժողովներ, Շրջանակային Յանձնաժողովներու եւ մասնաճիւղերու վարչութեանց ներկայացուցիչներու մասնակցութեամբ:

Ընդհանուր Ժողովի եւ յարակից ծրագիրներու ճոխ եւ խանդավառ օրերու աւարտին, մասնակիցները հրաժեշտ տուին իրարու, Միութեան առաքելութեան արդի տարածականութեան եւ անոր գործունէութիւններու համաշխարհային ու համամարդկային հնչեղութեան խոր հասկացողութեամբ եւ ըմբռնումով: Ամփոփելով շաբաթավերջի իր տպաւորութիւնները, Նախագահ Պերճ Սեդրակեան ըսաւ. «Անցնող չորս օրերու ընթացին մեր խոհական քննարկումներուն, խորհրդածութիւններուն եւ վերլուծումներուն լոյսին տակ, երբ առիթը ունեցանք նաեւ գնահատելու մեր շրջանակին մէջ գործող բազմաթիւ ազգային եւ համամարդկային արժէք ներկայացնող ու ներդրում իրագործող անձնաւորութիւններ, կրնանք անգամ մը եւս վստահութեամբ նշել, թէ Հ.Բ.Ը.Մ.ը այսօր, աւելի քան երբէք, պատրաստ է իր առաքելութիւնը արդիւնաւորութեամբ շարունակելու, ազգային եւ համամարդկային

տարողութեամբ, ի շահ հայ ժողովուրդի բարօրութեան եւ համաշխարհային բեմի վրայ անոր պատմական դերի իրագործումին»

Հայկական Բարեգործական Ընդհանուր Միութիւնը (Հ.Բ.Ը.Մ.) աշխարհի մեծագոյն ոչ-շահամէտ հայկական կազմակերպութիւնն է, նուիրուած հայեցի ինքնութեան եւ ժառանգութեան պահպանումին եւ մշակումին՝ կրթական, մշակութային եւ մարդասիրական ծրագիրներով: Միութեան գործունէութիւնները բարերար ազդեցութիւն կը բերեն տարեկան 500,000-է աւելի անձերու կեանքերէն ներս, Հայաստանի ու Արցախի մէջ եւ Սփիւռքի տարածքին: Իր հիմնադրութենէն ի վեր, Հ.Բ.Ը.Մ.ը հաւատարիմ մնացած է համայն հայութեան բարօրութեան ապահովումին ուղղուած իր գլխաւոր առաքելութեան: Յաւելեալ տեղեկութիւններու համար այցելեցէք www.agbu.org կայքէջը:

ԼՈՒՍԱՆԿԱՐՆԵՐ

AGBU-90GA-01.jpg: *Կալա շքահանդէսի մեծարեալները եւ հիւրերը: Չախէն աջ՝ Սարգիս Տեմիրճեան, Սեդա Տեմիրճեան, Վաչէ Մանուկեան, Հ.Հ. Նախագահ Արմէն Սարգիսեան, Թամար Մանուկեան, Մնտորն-ի Բ. Գահաժառանք Տէյվիտ Արմսթրոնկ Ճանգ, Վերա Սեդրակեան եւ Պերճ Սեդրակեան*

AGBU-90GA-02.jpg: *Ենրովիժըն-ի աստղ Իվէթա Մուկուչեան, Հայաստանէն, ելոյթ կ'ունենայ Շարլ Ազնաւուրի յուշահամերգին ընթացքին*

AGBU-90GA-03.jpg: *Համագումարի ակնառու մասնակիցներ կը բաժնեն իրենց վերլուծական խորհրդածութիւնները եւ պատգամները, «Ղեկավար Դիրքերու Վրայ Գտնուող Կիներ» նիստի ընթացքին: Չախէն աջ՝ Իգապէլ Քափրօն, Վալէրի Թորանեան, համադրող Արտա Յարութիւնեան, Էմմա Առաքելեան եւ Ասդրիտ Փանոսեան*

Յաւելեալ Տեղեկութեանց համար - Կապ

AGBU Press Office

55 East 59th Street

New York, NY 10022-1112

Phone: 212.319.6383

Email: communications@agbu.org